

Kugboŋu kun Pɔɔl ŋmàñ ki tī

Fiileemɔŋyee

Tibɔkilkaal

Fiileemɔn nɔn sá unikpaan ubɔ ní. U nɔn fōo Kriisitoo ki kíf ní ki máaŋ ki nɔn bí Kooloosi nikitilin. U nɔn sá Pɔɔl bɔɔ ní (B. 1). U nɔn cáá uyumbu ubɔ, bi yíi-u Ooneesiim. U-yumbuu gbanti nɔn sáñ-u. Taa nyí an nín dī pu ní Ooneesiim dāa nyàab ki ká Pɔɔl un nɔn bí sarkee. Kun ti nyée di sá yii u mun dāa fōo Kriisitoo ki kíf. Pɔɔl nɔn lēē yii u làá giín-u u-ƙpiliu cee. An pu ní u ŋmàñ u-ƙpiliu gbanti kugboŋu nee ki gbāam-u ú fōo-u kii kinabikee fookii poon, an taa nín sá kii uyumbuee. Di sá yii uyumbu yaa nɔn sáñ ní bi cúú-uee, bi nɔn dátí u-tafal ŋkpitim pu ní.

Pɔɔl nín jáam Fiileemɔn nì bin kòd u-dumpuee ki dóyee (1-3), ní u jáam Unimbɔti u-fookiiu nì u-faŋgiil pu (4-7). Míñ boonee ní u gbāam-u Ooneesiim un làá fātí gítí u-dindaan Fiileemɔn ceeyee pu (8-22). Ijaam in kúntí kugboŋu neeyee poonee, ti kántí Pɔɔl yííñ binib biba yíŋŋi. Ti gítí kántí ayin gbanti Kooloosi gbɔŋkun (4.10,12,14, ti ŋūñ kí gítí sòòñ Aarsiipee un ti kántí biyakatikaabi 2 nì Kool 4.17). An ŋūñ kí nín sá yii Ooneesiim nín cáá tigbɔnliitil ki cūnni, an dàkà yii Kooloosi nì Fiileemɔn gbɔnti.

Ti kántí Pɔɔl nín ŋmàñ u-bɔɔ Fiileemɔn kugboŋu nee nì iciin poon puee. Waa bíi tì-u mara, kaa ti bíi páb-u tiba poon. Waa tí bíi lì mun yii Fiileemɔn kaa cáá Ooneesiim pu nsan kí ŋá-u u nín là puee. Ama u bíi téetí-u ki ƙpáañ bin kòkò làá kàañ kugboŋu nee min ní Kriisitoo neendi ŋmíntí tiwan kòkò pu tí ƙpántí tipɔn ní ki yàntí binib kansikin bítam mun ƙpántí puee ní.

Ijaam

1 ¹Man Pɔɔl un sá usarkadaan Yeesu Kriisitoo puee nì ti-nabiki Tiimootee di ŋmàñ kugboŋu nee.

Ti ŋmàñ-ku kí tī sii Fiileemɔn ti-tɔntɔŋjuti un ti néénee, ²nì ti-niisal Apiya nì Arisiipi^a ti-janajuti, nì Kriisitoo nikitil din ƙpáfí a-diikunee ní. ³Ti-Baa Unimbɔti nì ti-Dindaan

Yeesu Kriisitoo nì ŋá-ni tiŋan kí tī-ni ŋgbansɔŋfi.

Fiileemɔn fookiiu nì u-neendi

⁴Baabadal, m yaa bí ki mée m-Nimbɔtiuee, m téetí a-pu ki jáam-u a-pu, ⁵kun puee m gbil bi sòòñ a-fookiiu un a cáá ti-Dindaan Yeesu puee nì dineendi din a cáá

Unimbɔti yab kòkò mun puee pu. ⁶M mée-u yii fookii un yànti ti nì si ŋá ubaantee nì m̀tíí yàntí á bée tiŋan tin kòkò Unimbɔti ŋáañ-ti Kriisitoo puee. ⁷M-nabiki, a-neendi din a cáá nnabiyaamu puee m̀ókiñ-mi ki tī-mi kunyannyaau tikpil, kun puee a tī Unimbɔti yab kunyannyaau.

Pɔɔl gbàam Fiileemɔn Ooneesiim pu

⁸Míñ puee, nì min kòkò ti nì Kriisitoo ŋá ubaantee, m bàà ŋūñ kí dàkà-si min sá á ŋée, ⁹ama man kaa làá dī míñ pu. Nì dineendi puee, man Pɔɔl un sá utikpil ki gítí tí sá usarkadaan Yeesu Kriisitoo puee làá gbāam-si ní. ¹⁰M gbāam-si m-biki Ooneesiim pu. Sarkan dooyee, man di ƙpántí u-baa nnimbɔtisan poon. ¹¹Dooyee, waa nɔn kèetí-si, ama ƙɔŋkɔnnee u kèetí man, ki làá kèetí si mun.

¹²Ƙɔŋkɔnnee, u ƙpántí kii man m-ba wunti jandi dibee ní, ama m dū-u ki giín ki tīn-si ú nín bí a-cee. ¹³Kii Tibɔmɔntiil sɔontam nín yànti m bí sarkan puee, m bàà là yii ú fōo a-yil kí nín bí m-cee kí tūtuñ-mi kii sii nín bàà làá nín tūtūñ-mi puee. ¹⁴Ama maa là kí ŋá míñ kaa bālifi-si, kaa tí là kí páb-si yii á ŋá tiŋan nee kí tī-mi. M là yii á ŋá min a-pɔbil lèe ní.

¹⁵An yaa yíi, Ooneesiim yíki a-cee ŋyunti ŋubɔ fiii, án nín làá ŋá pu, u

yaa láa fātí ki gítínee, si nì u nì ŋmā kí nín kíñ ki bí jaanjaanee. ¹⁶Kun puee waa ti sá uyumbufantanti. Ƙɔŋkɔnnee u jítí uyumbu pu, u kíñ ki sá kinabineeŋkaai ní. Man nééñ-u tiŋan, ama sii làá nín gítí nééñ-u tikpil, kun puee u sá sii yumbuu ní, ní ki sá a-nabiki mun ti-Dindaan pu.

¹⁷Míñ puee, a yaa nyí yii m sá a-bɔyee, á fōo-u kii a nín bàà làá fōo man puee. ¹⁸U yaa bíi-si tibaaa, u yaa tí jín-si dipɔndaaa, man fōo ki ŋá m-ba. ¹⁹Man Pɔɔl m-ba di dū m-ŋal ki ŋmàñnì-si tibɔti nee yii, man di làá pà-si u-pɔndi din u yaa jín-see. An taa nín sá yii a nín sá m-pɔnliu, kun puee a ká difiil man puee pu ní m t̀n-si. ²⁰Míñ puee, m-nabiki, m cikiñ-si kifuulii. Ti-Dindaan puee á fōo m-gbaamii gbanti kí yàntí m-pɔbil nì s̀ŋkí, ti nín ŋá ubaanti nì Kriisitooyee pu.

²¹M nyí m-pɔbilin yii tin m bíi ŋmà-si yii á ŋá kí tī-mi nee, a làá ŋá án jítí míñ pu gba. ²²Á ƙpáaa bɔntí-mi kudii kubɔ, kun puee m nyí yii Unimbɔti làá fōo ni-wimmeem nì ŋmā kí fātí gítíñ ni-cee.

Ijaam iluŋkikaa

²³Eepafrasi^b man nì un bí sarkan Yeesu Kriisitoo puee jáam-si. ²⁴M-tɔntɔŋjutiibi Maarki nì Ariistaarki nì Deemasi nì Luuki mun jáamiñ-si^c.

²⁵Ti-Dindaan Yeesu Kriisitoo ŋanti nì nín bí ni-pu.

^b 1.23 Eepafrasi: ƙpèè Kool 1.7, 4.12.

^c 1.24 Maarki: ƙpèè 2 Tiim 4.11. - Ariistaarki: ƙpèè Atuun 19.29, 27.2, Kool 4.10.

- Deemasi: ƙpèè Kool 4.14, 2 Tiim 4.10. - Luuki: ƙpèè Kool 4.14, 2 Tiim 4.11.

^a 1.2 Arisiipi: ƙpèè Kool 4.17.